

Послѣдованіе по Святомъ Причащеніи.

Слава Тебѣ, Боже. Слава Тебѣ, Боже. Слава Тебѣ, Боже.

Таже благодарственныя сія молитвы глаголи:

Благодарю Тя, Господи Боже мой, яко не отринулъ мя еси грѣшнаго, но общника мя быти святынь Твоихъ сподобилъ еси. Благодарю Тя, яко мене недостойнаго причаститися пречистыхъ Твоихъ и небесныхъ даровъ сподобилъ еси. Но, Владыко Человѣколюбче, насъ ради умерый же и воскресый, и даровавый намъ страшная сія и животворящая Таинства, во благодѣяніе и освященіе душъ и тѣлесъ нашихъ: даждь быти симъ и мнѣ во исцѣленіе души же и тѣла, во отгнаніе всякаго сопротивнаго, въ просвѣщеніе очію сердца моего, въ миръ душевныхъ моихъ силъ, въ вѣру непостыдну, въ любовь нелицемѣрну, во исполненіе премудрости, въ соблюденіе заповѣдей Твоихъ, въ приложеніе Божественныя Твоея благодати, и Твоего Царствія присвоеніе: да во святыни Твоей тѣми сохраняемъ, Твою благодать поминаю всегда, и не ктому себѣ живу, но Тебѣ нашему Владыцѣ и благодѣтелю: и тако сего житія изшедъ о надежди живота вѣчнаго, въ присносущный достигну покой, идѣже праздноующихъ гласъ непрестанный, и безконечная сладость, зрящихъ Твоего лица доброту неизреченную. Ты бо еси истинное желаніе, и неизреченное веселіе любящихъ Тя, Христе Боже нашъ, и Тя поетъ вся тварь во вѣки. Аминь.

Молитва 2-я, Великаго Василия:

Владыко Христе Боже, Царю вѣковъ, и Содѣтелю всѣхъ, благодарю Тя о всѣхъ, яже ми еси подалъ благихъ, и о причащеніи пречистыхъ и животворящихъ Твоихъ Таинствъ. Молю убо Тя, Блаже и Человѣколюбче: сохрани мя подъ кровомъ Твоимъ, и въ сѣни крилу Твоею: и даруй ми чистою совѣстію, даже до послѣдняго моего издыханія, достойно причащатися святынь Твоихъ, во оставленіе грѣховъ, и въ жизнь вѣчную, Ты бо еси хлѣбъ животный, источникъ

святыни, Податель благихъ: и Тебѣ славу возсылаемъ, со Отцемъ и Святымъ Духомъ, нынѣ и присно, и во вѣки вѣковъ. Аминь.

Молитва 3-я, Метафраста, по стихомъ:

Давый пищу мнѣ плоть Твою волюю, огонь сый и опаляй недостойныя, да не опалиши мене, Содѣтелю мой; паче же пройди во уды моя, во вся составы, во утробу, въ сердце. Попали тернии всѣхъ моихъ прегрѣшеній. Душу очисти, освяти помышления. Составы утверди съ костями вкупѣ. Чувствъ просвѣти простую пятерицу. Всего мя спригвозди страху Твоему. Присно покрый, соблюди же, и сохрани мя отъ всякаго дѣла и слова душетлѣннаго. Очисти и омый, и украси мя: удобри, вразуми, и просвѣти мя. Покажи мя Твое селение единого Духа, и не ктому селение грѣха. Да яко Твоего дому, входомъ причащения, яко огня мене бѣжитъ всякъ злодѣй, всяка страсть. Молитвенники Тебѣ приношу вся святыя, чиновачалія же бесплотныхъ, Предтечу Твоего, премудрыя Апостолы, къ симъ же Твою нескверную чистую Матерь, ихже мольбы, Благоутробне, прими, Христе мой, и сыномъ свѣта содѣлай Твоего служителя. Ты бо еси освящение и единый нашихъ, Блаже, душъ и свѣтлость: и Тебѣ лѣпоподобно, яко Богу и Владыцѣ, славу вси возсылаемъ на всякъ день.

Молитва иная:

Тѣло Твое Святое, Господи Иисусе Христе, Боже нашъ, да будетъ ми въ живото вѣчный, и Кровь Твоя честная во оставление грѣховъ: буди же ми благодарение сіе въ радость, здравіе и веселіе: въ страшное же второе пришествіе Твое, сподоби мя грѣшнаго стати одесную славы Твоея, молитвами Пречистыя Твоея Матере, и всѣхъ святыхъ.

Молитва иная, ко Пресвятѣй Богородицѣ:

Пресвятая Владычице Богородице, свѣте помраченныя моея души, надеждо, покрове, прибѣжище, утѣшение, радование мое, благодарю Тя, яко сподобила мя еси недостойнаго, участника быти пречистаго Тѣла и честныя Крове Сына Твоего. Но рождающая истинный Свѣтъ, просвѣти моя умныя очи сердца: Яже источникъ безсмертія рождающая,

оживотвори́ мя умерщвлѣннаго грѣхѡмъ: Яже милостиваго Бога любоблагоутробная Мати, помилуй мя, и даждь ми умиленіе, и сокрушеніе въ сердцѣ моёмъ, и смиреніе въ мыслехъ моихъ, и воззваніе въ плѣненіихъ помышленій моихъ: и сподоби мя, до послѣдняго издыханія, неосужденно приимати пречистыхъ Таинъ освященіе, во исцѣленіе души́ же и тѣла. И подаждь ми слезы покаянія и исповѣданія, во еже пѣти и славити Тя во вся дни живота́ моего, яко благословенна и препрославленна еси́ во вѣки. Аминь.

Молитва св. Сумеона:

Нынѣ отпускаеши раба Твоего, Владыко, по глаголу Твоему, съ миромъ; яко видѣста очи мои спасеніе Твое, еже еси́ уготовалъ предъ лицемъ всѣхъ людей, свѣтъ во откровеніе языковъ, и славу людей Твоихъ, Израїля.

Святы́й Бо́же, Святы́й Крѣпкій, Святы́й Безсмертный, помилуй насъ *(трижды)*.

Слава Отцу́ и Сы́ну и Свято́му Ду́ху, и нынѣ и присно и во вѣки вѣковъ. Аминь.

Пресвятая Троице, помилуй насъ; Господи, очисти грѣхи́ наша; Владыко, прости беззаконія наша; Святы́й, посети́ и исцѣли́ немо́щи наша, имене Твоего́ ради.

Господи, помилуй *(трижды)*.

Слава Отцу́ и Сы́ну и Свято́му Ду́ху, и нынѣ и присно и во вѣки вѣковъ. Аминь.

Отче нашъ, Иже еси́ на небесѣхъ! Да святится имя Твое, да приидеть Царствіе Твое, да будетъ воля Твоя, яко на небеси́ и на земли. Хлѣбъ нашъ насущный даждь намъ днесь; и остави намъ долги́ наша, якоже и мы оставляемъ должникомъ нашимъ; и не введи́ насъ во искушеніе, но изба́ви насъ отъ лукаваго.

Тропарь Святому Іоанну Златоустому, гласъ 8-й:

Усть твоихъ якоже свѣтлость огня, возсіявши благода́ть, вселенную просвѣти: не сребролюбія мірови сокровища сниска́, высоту́ намъ смиренномудрія показа́, но твоими́ словесы́ наказуя, отче Іоанне Златоусте, моли́ Слова Христа́ Бога спасти́ся душамъ нашимъ.

Слава Отцу и Сыну и Святому Духу:

Кондакъ, гласъ 6-й:

Отъ небесъ пріялъ еси божественную благодать, и твоими устнами вся учиши покланятися въ Троицѣ единому Богу, Иоанне Златоусте всеблаженне, преподобне, достойно хвалимъ тя: еси бо наставникъ, яко божественная являя.

И нынѣ и присно и во вѣки вѣковъ. Аминь.

Предстательство христіанъ непостыдное, ходатайство ко Творцу непреложное, не презри грѣшныхъ моленій гласы, но предвари, яко Благая, на помощь насъ, вѣрно зовущихъ Ти: ускори на молитву, и потщися на умоленіе, предстательствующи присно, Богородице, чтущихъ Тя.

Аще же будетъ святаго Василия литургія, чти:

Святому Василию тропарь, гласъ 1-й:

Во всю зѣмлю изыде вѣщаніе твоє, яко приѣмшую слово твоє, имже боголѣпно научилъ еси, естество сущихъ уяснилъ еси, человѣческія обычаи украсилъ еси, царское священіе, отче преподобне, моли Христа Бога, спастися душамъ нашимъ.

Слава Отцу и Сыну и Святому Духу:

Кондакъ, гласъ 4-й:

Явился еси основаніе непоколебимое Церкви, подая всемъ некрадомое господство человекомъ, запечатляя твоими велѣньми, небоявленне Василие преподобне.

И нынѣ и присно и во вѣки вѣковъ. Аминь.

Предстательство христіанъ непостыдное, ходатайство ко Творцу непреложное, не презри грѣшныхъ моленій гласы, но предвари, яко Благая, на помощь насъ, вѣрно зовущихъ Ти: ускори на молитву, и потщися на умоленіе, предстательствующи присно, Богородице, чтущихъ Тя.

Аще же будетъ литургія Преждеосвященныхъ, чти:

Святому Григорію тропарь, гласъ 4-й:

Иже отъ Бога свѣше Божественную благодать воспріемъ, славне Григоріе, и Того́ сілою укрѣпляемъ, евангельски шествовати изволилъ еси, отонудуже у Христа́ возмездіе трудовъ пріялъ еси всеблаженне: Его́же моли, да спасетъ души наша.

Слава Отцу́ и Сы́ну и Святому́ Ду́ху:

Кондакъ, гласъ 3-й:

Подобоначальникъ показался еси Начальника па́стыремъ Христа́, иноковъ чреды, отче Григоріе, ко оградѣ небеснѣй наставляя, и отту́ду научилъ еси стадо Христо́во заповѣдемъ Его́; нынѣ же съ ними радуешися, и ликуеши въ небесныхъ кровѣхъ.

И нынѣ и присно и во вѣки вѣковъ. Аминь.

Предстательство христіанъ непосты́дное, ходатайство ко Творцу́ непреложное, не презри грѣшныхъ моленій гласы, но предвари, яко Благая, на по́мощь насъ, вѣрно зовущихъ Ти: ускори на молитву, и потщися на умоленіе, предстательствующи присно, Богородице, чтущихъ Тя.

Господи, помилуй (12).

Слава Отцу́ и Сы́ну и Святому́ Ду́ху, и нынѣ и присно и во вѣки вѣковъ. Аминь.

Честнѣйшую херувимъ и сла́внѣйшую безъ сравненія серафимъ, безъ ислѣнія Бога Слова ро́ждшую, су́щую Богородицу Тя величаемъ.

И отпу́сть.